

Canal 90 a nombra 'Mexican Jam' como nan Road Jam 2003

Añanan atras Canal 90 a cuminsa otorga e premiacion di 'Road Jam' na e roadmarch cu a resulta di ta esun di mas popular pa e pueblo Carnavalesco durante full e temporada di Carnaval. Pa simplifica un ke otro, por bisa cu Canal 90 ta scohe di tur roadmarch cu a participa den e Calypsonian & Roadmarch Contest, e roadmarch cu mas a resalta durante henter e temporada di Carnaval, como e 'Road Jam' di Carnaval y esaki a base di e siguiente criteriannan:

- Djan di Canal 90 ta presencia eventonan grandi di SAC, entre otro jump-upnan, eleccion di Reina di Carnaval, eleccion di scolnan, paradanan, etc.



- Ta haci nota di diferente peticionnan di radiooyentenan pa cu cierto roadmarch durante nan programacion.
- Ta evalua ambiente Carnavalesco.

Despues di evaluacion, votacion y conteo, ta scohe esun mas pidi pa e pueblo Carnavalesco. A base di un decision unanime, e Djan di Canal 90 a scohe 'Mexican Swing' di Mighty Mike como e ganador absoluto pa aña 2003.

No mester ta un musico of compositor pa por huzga e ganador di 'Road Jam' durante temporada di Carnaval, pero simplemente scohe e roadmarch mas pidi pa nos Carnavalistanan, full e temporada di Aruba su Carnaval.

Sigur por bisa cu e presentacion di Mighty Mike a sa di conquista cariño di e pueblo Carnavalesco. Un persona simpel, a duna un aporte real na nos dushi Carnaval, segun Canal 90. *Semper eia y contento pa jam cu grandi y chikito*, ta con e emisora ta describi e ganador.

Pabien Aruba, cu bo 'Road Jam 2003' y danki special na tur e patrocinadornan cu a coopera cu e transmisionnan y programacion Carnavalesco.



TBS - Brassband di Aña 2003

Esaki ta un premio cu ta dushi y marga pa e lider y integrantenan di The Brass Selection. E motibo ta cu nan tabata e unico brassband riba caminda e Carnaval aki. Na comienzo otro brassband a saca un produccion pero no a tende nada mas di nan y sigur no tabata den parada. Pesey TBS, aunke gradicido pa e mencion di parti di SAC, no a sinti cu a competi pa esaki cu otro brassband. Pronto nan lo ta biahando pa duna presentacion di e ritmo asambeho cu ta tan gusta.

